

Cyflwyno cynlluniau ar gyfer ysgolion newydd yn Ninbych-y-pysgod

Mae cais cynllunio wedi cael ei gyflwyno ar gyfer dwy ysgol gynradd newydd yn Ninbych-y-pysgod.

Yn gynharach eleni fe roddwyd sêl bendith ar fuddsoddiad o £8.37 miliwn mewn addysg gynradd yn y dref sydd yn Ne Sir Benfro.

Bwriada Cyngor Sir Penfro agor dwy ysgol newydd ar safle presennol Ysgol Gynradd Dinbych-y-pysgod sydd yn Heywood Lane.

Awdurdod Parc Cenedlaethol Arfordir Penfro fydd yn penderfynu ar y cais hwn sy'n cynnwys dyluniadau ar gyfer adeilad newydd sbon Ysgol Gynradd Wirfoddol a Reolir, cyfrwng Saesneg, i blant 3-11 oed, a fydd yn cael ei adeiladu wrth ochr yr Ysgol Gynradd bresennol.

Mae'r cais hefyd yn cynnwys atgyweirio'r Ysgol Gynradd bresennol er mwyn llunio Ysgol Gynradd Gymunedol newydd, cyfrwng Cymraeg, i blant 3-11 oed.

Bydd adeilad presennol Ysgol Fabanod Dinbych-y-pysgod yn cael ei ddymchwel.

Bydd cost y prosiect £8.37 miliwn yn cael ei rhannu rhwng y Cyngor Sir a rhaglen Ysgolion ar gyfer yr 21ain Garif sy'n cael ei chynnal gan Lywodraeth Cymru.

"Y cam nesaf ymlaen i'r prosiect cyffrous hwn yw'r cais cynllunio," meddai'r Cyngorydd Ken Rowlands, yr Aelod Cabinet dros Blant ac Ysgolion.

"Bydd y ddwy ysgol hyn yn rhoi'r cychwyn addysgol gorau posibl mewn bywyd i blant yr ardal.

"Bydd hefyd yn dangos bod y Cyngor yn benderfynol o ddal ati i fuddsoddi ym maes addysg ac yn nyfodol ein pobl ifanc."

Yn gynharach, fe wnaeth Huw Lewis, y Gweinidog Addysg a Sgiliau, roi sêl ei fendith ar y cynigion, ac meddai:

"Bydd sefydlu'r ddwy ysgol hyn yn hybu darpariaeth addysg o safon uchel gyda chyfleusterau pwrpasol i ysgolion ar gyfer yr 21ain ganrif."

Mae'r Gweinidog wedi rhoi sêl ei fendith ar y cais, yn sgil ymgynghoriad y gwnaeth y Cyngor Sir ei gynnal â rhieni, staff a llywodraethwyr Ysgol Fabanod WR Dinbych-y-pysgod ac Ysgol Gynradd Gymunedol Dinbych-y-pysgod yn 2012, a hefyd yn sgil cyhoeddi Hysbysiad Statudol yn 2013.

Bydd dalgylchoedd yr ysgolion cynradd newydd yn aros yn union yr un fath â'r ardaloedd hynny y mae'r ysgolion presennol yn eu rhannu ar hyn o bryd.

Tîm penseiri mewnol y Cyngor Sir fydd yn dylunio adeilad newydd yr ysgol cyfrwng Saesneg a fydd â lleoedd i 390 o ddisgyblion. Bydd gyda hi gymeriad crefyddol dynodedig hefyd er mwyn cynnal swyddogaeth yr eglwys yn narpariaeth addysg gynradd Dinbych-y-pysgod.

Bydd gyda hi uned â dwy ystafell ddosbarth i blant ag Anghenion Addysgol Arbennig, ystafell ddosbarth meithrin â 30 lle, a lle i 15 disgybl mewn ystafell ddosbarth meithrin/dosbarth derbyn cymysg. Ac ar ben hynny bydd gyda hi ddarpariaeth ar gyfer cylch chwarae y blynyddoedd cynnar.

Bydd gan yr ysgol gyfrwng Cymraeg leoedd i 210 o ddisgyblion, yn ogystal ag ystafell ddosbarth meithrin a all dderbyn 30 disgybl. Bydd y ddarpariaeth hefyd yn cynnwys man tawel a chyfleusterau chwarae yn yr awyr agored.

Os rhoddir sêl bendith ar y cais cynllunio, y gobaith yw y bydd yr ysgolion newydd yn barod i dderbyn disgyblion o 31 Awst 2016 ymlaen.

Geiriad

Dyma luniadau'r penseiri sy'n dangos safle'r ysgolion arfaethedig â'r ysgol newydd cyfrwng Saesneg.